

59

HARVARD COLLEGE LIBRARY
FROM THE
HARVARD-YENCHING
INSTITUTE
APR 29 1980

Ch L 3203,88

Ch L 3203 / 3142 / 88

江南通志卷一百四十六

人物志

宦績八 安慶一府

安慶府

漢朱邑字仲卿廬江舒人少為桐鄉嗇夫廉平不苛以愛
 利為行未嘗笞辱人存問耆老孤寡吏民愛敬焉遷太
 守卒史舉賢良為大司農丞遷北海太守以治行第一
 入為大司農多薦賢士大夫居處儉節祿賜以共九族
 鄉黨病屬其子曰我故為桐鄉吏其民愛我必葬我桐
 鄉民果為邑起冢立祠歲時祭祀不絕

三國吳陳修廬江松滋人陳武子有父風年十九孫權召



見拜別部司馬授兵五百人時諸新兵多有逃叛修撫循得其意不失一人拜校尉建安末追錄功臣後封都亭侯爲解煩督

陳表字文興武庶子少知名侍東宮徙太子中庶子拜翼正都尉修亡後表母不肯事修母表勸以大義二母感悟雍穆表以父死敵場求用爲將領兵五百人傾意接待士樂爲用無難士施明盜官物廷尉收考極毒無辭表誘之乃首服遷無難右部督封都亭侯以繼舊爵表皆陳讓乞以傳修子延不許嘉禾三年領新安都尉料取所受賜復人戶以充部伍廣開納降得兵萬餘人鄱陽民吳遽等爲亂表越界討破之拜偏將軍進封都

鄉侯家財盡於養士及卒妻子露立太子登爲起屋宅子敖年十七拜別部司馬敖卒修子延復爲司馬代敖

晉何充字次道廬江灑人成帝時爲東陽太守會稽內史甚有德政除丹陽尹王導庾亮並薦充器局方槩有萬夫之望必能總錄朝端願引充內侍由是加吏部尚書歷中書令建元初都督徐州揚州入輔幼主臨朝正色以社稷爲己任卒贈司空謚文穆

何澄字季懸起家秘書郎清正有器望卒贈金紫光祿大夫

南北朝齊何昌寓字儼望廬江灑人少清靖爲建平王景素府主簿以風素見重出爲湘東太守景素被誅昌寓

江南通志 卷四十一
啟太祖直其冤太祖嘉其義復爲南郡太守行荊州事
臨海王昭秀將被害以昌寓得還京師歷官吏部尚書
復爲侍中卒贈太常諡簡子昌寓不雜交遊通和汎愛
歷郡皆清白士君子多稱之

梁何敬容字國禮昌寓子初爲建安內史清公有美績普
通中守吏部尙書銓序明審號爲稱職出爲吳郡太守
勤恤民隱辨訟如神治爲天下第一遷尙書右僕射叅
掌選事久處臺閣詳悉舊事聰明識治勤於簿領嘗奏
侯景終當亂國其言卒驗子穀祕書丞

唐張鎮周舒人武德八年爲本州都督就故宅多市酒肴
召親戚酣飲如布衣時凡十日旣而分贈金帛泣別曰
今日鎮周猶得與故人聚明日則舒州都督治百姓耳
自是親故犯法一無所縱境內肅然

宋王罕字師言珪之季父自成都徙舒州以蔭知宜興縣
縣多湖田歲訴水輕重失其平罕躬至田間圖其高下
衆莫能欺范仲淹在潤奏下其式於諸道遷戶部判官
出爲廣東轉運使儂智高入寇罕行部在潮廣州守仲
簡自圍中遣書邀罕罕遂還惠州簡卒三千順流而下
至廣營於南門智高見其嚴備遂解去以功爲西路轉
運使徙知潭州爲政務適人情不加威罰伸狂婦之冤
郡人傳爲神明監司上治狀勅書褒諭賜絹三百
王瑛字君玉珪之從兄兒童時已能爲歌詩起進士調

江都主簿上時務十二事仁宗嘉之通判舒州歲饑奏發廩救民未報先賑以公租守以下皆不聽琪挺身任之徙知江寧先是府多火災或託以鬼神人不敢救琪捕得姦人誅之火患遂息以禮部侍郎致仕琪性孤介不與時合數臨東南名鎮政尚簡靖及葬真州詔真揚二州發卒護其窆蓋異數也

潘琛宿松人嗜學寒暑無間由進士爲祁門丞教崇禮讓士民化之

元虞執中字伯權望江人至元間鄉貢第一成進士授將仕郎居官恪謹公事無滯山南憲府多獎進之

明黃敏字宗學桐城人洪武初以歲薦歷官兵部員外郎奏罷糧運不便者數事以忤旨左遷上林監丞陞長蘆鹽運副使鹽弊肅清有奸奄以私販事誣敏謫戍興州以朝臣薦復遷工部主事擢廣西按察司副使威惠並茂有古憲臣風

劉燾字尙載太湖人洪武間以明經知柳州府歷嘉興寧波西安長沙彰德汀州咸有政績爲治寬厚慈祥不施鞭扑有不法者但勸諭之人皆感化官至雲南叅政柳州長沙咸立祠祀之

呂衡字仕平太湖人洪武間歲薦授監察御史遇事敢言巡按廣東風裁甚著貪墨皆望風解印綬去

劉瑩字仲瑀桐城人永樂癸未進士官御史歷永平廣

平二郡守爲政平易人歌曰太守政平二郡皆寧

饒政字文質望江人永樂乙未進士運糧江西旣竣役同事十三人分別授御史僉事政上章願授教職上可其請先後四任學博凡二十年造就諸士皆一時名臣年八十歸里

程收字太和桐城人宣德丙午舉人任磁州同知時蝗大發收虔禱於神忽禿鶯飛集啄蝗殆盡因以有聲改滄州值旱收禱於五龍井有白魚五出見兩大注歲遂稔民共立五龍廟肖像祀之

吳昇字亨晦懷寧人宣德癸丑進士擢工科給事中遇事敢諫封駁糾正有聲於時正統時廷議郡縣守令用大臣薦昇謂受官公朝拜恩私室不可又議大臣舉御史昇謂御史旣被大臣舉則大臣有不法恐御史瞻顧私恩咸奏止之閩浙礦徒爲亂擢昇浙江布政司叅議往輯之昇捕斬渠魁撲滅黨與且廉其失機都指揮以下數人寘之法衆皆股栗賊遂屏息

姚旭字景陽桐城人景泰辛未進士官刑科給事中敷奏詳明直聲大著謫判鄭州清慎自勵擢南安守盡心民事尤以學校爲先終雲南叅政

方佑字建輔桐城人天順丁丑進士擢監察御史風裁凝峻初按河間錦衣官校素怙寵爲奸聞佑風皆惴惴聽命有盜殺縣簿捕弗獲設計襲誅之移按蘇浙鹽政

再按廣西有平苗賊功後忤中使廷杖謫知攸縣補桂
林知府

王道字懿德潛山人天順己卯舉人任杭州通判威惠
並行以梗介忤直指使者卽挂冠歸直指追檢其舟中
惟敝簏盛書數卷乃慚謝道更以野服拜辭直指知意
不可奪嗟嘆久之成化間有盜經其家借炊焉曰知廉
吏無他求也

王瑞字良璧望江人成化己丑進士授吏科給事中在
文華殿抗言內寵滋甚上震怒不懾晉都給事中劾倖
進者多攀緣超越濫竊名器上嘉納詔吏部貶四人奪
九人官凡居言路十五年疏諫皆朝廷大事遷湖廣叅

議告歸

方向字與義桐城人成化辛丑進士授南戶科給事中
巨璫守備京甚跋扈乃疏劾其罪狀并文武大臣十
數人璫銜之因事誣逮下獄貶雲南驛丞歷官瓊州知
府地產珠璞私市其一索而投之於海

蕭世賢字若愚桐城人弘治乙丑進士任刑部郎中執
法不撓獄多平反出守嘉興歲革羨金千餘不染一塵
立三館以造士文風蔚起擢湖廣副使去道卒囊無餘
貲以故服殮

李楫字濟之懷寧人弘治乙丑進士爲監察御史按山
西搜剔宿弊忤當道謫判沔陽移泰和令從王守仁平

逆濠歷遷貴州叅議時芒部弗緝楫贊臺臣徃征之賊平錄功尋乞歸

錢如京字公溥桐城人弘治壬戌進士選監察御史所至有真御史名正德時累擢至都御史巡撫保定等府歲大饑請發內帑數萬緡賑濟民賴以生轉兵部侍郎提督兩廣軍務所轄土官多相仇殺獄未決疏請褫土官職許立功自贖兵不血刃地方以寧晉刑部尙書告歸卒之夕有大星隕於城中事聞加太子少保諭祭葬李淳字元樸太湖人弘治壬戌進士任行人擢刑科給事以忤劉瑾轉浙江僉事浙東盜起淳督兵勦捕之會有星變出揚州分淳曰杭必有災令民間儲水以備已

而杭城果火得無患調廣西按察值撫江土徭及苗民讐殺淳討平之

余珊字德輝桐城人正德戊辰進士由行人擢御史忠直敢言不避權倖以發中貴人奸昧譖之下獄杖幾斃謫判安陸州嘉靖初起江西僉事討平梅花峒賊應詔陳十漸疏共萬四千言最爲剴切珊律已清嚴居官有威惠累遷四川按察使卒

齊之鸞字瑞卿桐城人正德辛未進士官給事中疏禦邊珥盜深切時務武宗自稱威武大將軍朱壽之鸞切諫又欲南巡之鸞首唱留駕率同僚伏闕號泣上意始沮王守仁平宸濠許泰忌其功誣毀百端之鸞力白之

世宗時遷寧夏僉事值歲饑民採蓬子為食乃封蓬子進於帝乞發帑賑之還朝夏人遮道號聲不絕歷遷河南按察使卒於官著有蓉川集入夏錄

吳檄字用宣桐城人正德辛巳進士少有氣節初授襄陽推官決疑獄賑饑民綽有能聲遷兵部武選郎中有都督僉事姜奭奏邊功議陞職方議可乃下武選擬官檄曰法斬首二百上者陞一級奭未滿八十當賞不當陞有劉民譽者其父從世宗起興藩賜錦衣衛指揮民譽欲襲職檄曰法非汗馬不世安得襲大司馬張讚固欲與之檄固不肯讚自為劄請詔不許檄亦以是外補耿介之操始終如一子自峒歷官太常卿有清望

盛汝謙字亨甫桐城人嘉靖辛丑進士授行人擢御史按關中歲饑民嘯聚為寇汝謙設糜賑之計擒倡亂者數人餘黨遂解遷光祿卿嚴嵩柄國獨守正乞歸嵩敗累擢操江僉都御史南京貢院號舍故用蘆葦汝謙捐俸修拓甃以磚轉戶部侍郎歸與吳一介倡議築桐城城後流賊之亂桐得保全

徐桂字子芳潛山人嘉靖乙未進士知鄖陽府治有寺妖僧緣為奸婦女佞佛者多墮其術桂得其情親詣寺縛主僧勘鞫律除之焚其寺鄖陽數十年巫風一旦盡

革

戴完字仲修桐城人嘉靖甲辰進士官戶部主事分司

德州改刑部郎嚴嵩用事重其名欲致私謁竟不往會
同部郎張翀上疏劾嵩杖戍夜郎嵩偵其疏與完合草
遂出補貴州僉事時盜賊屢發土官跋扈完杖之而以
恩撫其子乃畏服在任三月威德大著謝病歸

趙鈇字鼎卿桐城人嘉靖庚子鄉試第一甲辰登進士
累官至僉都御史巡撫貴州值土舍韓甸攫司印逐正
官糾黨稱兵三省騷動鈇督總兵等官會勦之又為黔
奏便宜六事皆議行焉

於惟一 字德夫 懷寧人 嘉靖癸丑進士 任南工部主事
守關嚴慎 適上所寵方士陶仲文欲轉關夜出 惟一繫
其行舟 時陶焰方熾 大為沮喪 御史吳時來叅嚴嵩被

謫出都 惟一獨祖餞 嵩銜之 出守太原 值歲荒 民相食
捐俸賑饑 民得全活 眾相呼為於家兒 擢陝西副使
金燕 字尚賓 潛山人 嘉靖癸丑進士 謁選桐鄉 令時海
寇猖獗 桐鄉濱海 無城 燕下車即為營築 城成而寇至
環攻四十餘日 寇遁 復設奇追殲之 擢禮科給事中 力
詆嚴嵩 奸謫 彝陵判後仕 至尚寶丞

阮自嵩 字思竹 桐城人 嘉靖丙辰進士 官刑部執法不
徇 屢觸權要 嚴嵩父子銜之 謫判沔陽 以官銀抵逋 負
脫二百餘人於獄 又清景藩閣豎所奪民田 致干叅奏
世宗原其無罪 再判濮州 均治河 苦役民 戴之後 復忤
當軸 以滄州守歸

吳自峒字石蘭檄子嘉靖壬戌進士授行人以清望選翰林待詔克裕王講官正色開陳穆廟卽位以青宮舊屬擢尙寶卿尋選太常寺卿自峒素與張居正善及居正柄政訖無一字相通旋以外補遂歸

李彥字龍陽望江人嘉靖辛酉舉人任台州別駕歲饑典賑事活數萬人窮民鬻妻輸稅彥爲贖完之有以孝聞者三式其廬擢漢中守屬鳳邑履畝圭度除荒糧五百石有奇

吳肇東字敬堂懷寧人隆慶戊辰進士知桂林府愛民如子猺獞頑梗者咸稽顙庭下擢福建按察使將晉浙撫會張居正奪情凡官聞者皆弔唁肇東獨不遣因請

長沙遂歸

張淳字希古桐城人隆慶戊辰進士知永康縣吏民狡黠前告罷七令淳至案牘委積剖決如流吏大駭服舉治行第一授禮部主事歷郎中張居正母死諷淳往祭乃謝病歸後起知建寧府歷陝西布政尋致仕優游林下廿餘年邑有重務力爲民請澤遍鄉里焉

劉尙志字士行懷寧人隆慶辛未進士授歸善令尋擢諫垣張居正柄國繩下嚴尙志上緩刑一疏歷任江西少參浙江海道選將練兵爲防倭計甚悉按察福建轉山東左布政致仕歸睦嫻任恤葬父躬壘負石哀聲徹林谷墓木生連理枝咸稱孝感

盛世承字以烈桐城人萬曆丁丑進士以部郎出備兵大同時邊事旁午世承馭以鎮靜威信著聞轉陝西右布政蘭州機戶疲於貢絨世承力蘇之擢四川左布政會有事於播播平又爲善後策蜀人賴之病免再起以原官備兵陝西按行部中墾河灘荒地至千餘頃爲秦中世世之利晉光祿卿璫禍削職

任可容字子賢懷寧人萬曆丁丑進士官處州守屬邑有以香葷進者中匿金可容懲解役遣之遷惠潮道嚴飭武備壁壘改觀一創倭於碣石再創倭於南澳有出海船三十餘隻詐稱總督家丁可容盡逮置法又於南澳擒洋商五十四人總督誤作賊可容力白其冤釋之

葉隆光懷寧人萬曆庚辰進士官吏部郎疏諫早定國本削籍歸卒光宗立詔求當日言事獲罪諸臣贈太僕寺少卿

徐堯莘潛山人萬曆丙戌進士歷荊州守中官陳奉開礦沙市掘塚瀦室道路以目堯莘約其騶從不得逞劉大將軍綖征播調兵數省途出自荆民爭避之堯莘爲經紀民獲安堵上嘉其勞晉廣東按察擢撫延綏不果赴與無錫顧憲成交密袁宗道以不言而躬行稱之

方大美字黃中桐城人萬曆丙戌進士授常德推官多所平反擢御史巡按江西整飭吏治尤好士培植甚多轉按河南捐俸賑荒全活萬人終太僕寺卿

楊材字遜生懷寧人萬曆己丑進士為戶部主事給散
京城各衛軍餉前官多侵牟材秉公散給權聲動地遷
吏部考功以執法忤當軸遂歸光宗立起太常卿轉左
通政

吳用先字體中桐城人萬曆壬辰進士由臨川令累官
都御史巡撫四川時播州亂大將劉綎以議餉不進用
先躬率師先之督綎合戰戮力勦撫數月蕩平尋謝病
上憫其勞特賜考績予告家居八年起少司空改樞貳
總督薊州建防禦十策殫力籌畫會瑞禍起致政歸
金忠士宿松人萬曆壬辰進士為御史劾奸弁袁守時
中貴邢隆立疏寢稅銀十五萬江南民獲更生巡按貴

州浙江河南三省定水西討路苗降思南賑恤無告招
撫流移後因建言忤旨左遷福寧道陞按察司備兵榆
林擢右藩撫延綏尋卒於邊諭祭葬贈卹

胡瓚字伯玉桐城人萬曆乙未進士授都水主事分司
南旺兼督泉牖泉司駐濟寧泗水所注瓚修金口壩遇
之時議徵稅濟寧力言不便而止累擢江西右叅政告
歸

何如寵字康侯桐城人萬曆乙未進士由翰林歷祭酒
宗伯以言事受知晉東閣大學士寬博坦白為正人所
歸體素弱遂稱疾乞休後復以元輔召固辭所陳奏獨
以培元氣達大體為務卒贈太保諡文端

何如申字仲嘉桐城人萬曆乙未進士授戶部主事時
尚書趙南渚加意率屬諸曹郎出署往往偵其所爲獨
如申鍵戶咨討本曹故實趙公嘗語人曰吾安得郎盡
如何者督糧遼東措置有方擢處州守諸衛士號泣攀
轅大中丞疏留之竟得請又三年以叅政分守嘉湖累
轉浙江右布政以病歸圖書外無長物

馬孟貞字泰符桐城人萬曆戊戌進士由分宜知縣擢
御史孤立不避強禦如摘制科之弊剪左道之惑陳僉
商之害辨代藩之立爭福府之田疏凡百七八十上直
聲振一時出爲廣東副使不赴天啓初起太僕少卿

姚之蘭字汝芳桐城人萬曆辛丑進士爲海澄令開九
都水利化斥鹵爲膏腴居人德之遂名其地曰姚港累
官杭汀兩郡守汀地僻民瘠適朝議加餉乃搜府庫藏
所餘者佐以贖義新餉五千金完如額不以累民督餉
使者以聞將超擢乃念母老請終養詔許之上嘉其急
公愛民晉秩副使以榮其歸焉

吳應琦字景韓桐城人萬曆甲辰進士擢監察御史巡
按雲南威惠遠播補浙江道按順永保河諸當相戒勿
汜累官南京大理卿

馬人龍字霖雨太湖人萬曆甲辰進士授戶部主事以
犒邊奏績權潯江稅賈人德之爲立生祠遷粵西桂林
道苗瑤大訶人龍修戰艘繕城郭禦之轉楚右藩有楚

才錄蕉園草行世

倪應春字申之桐城人萬曆丁未進士累擢御史敷陳
皆軍國重計光宗賓天引春秋世子不嘗藥正紅丸之
罪李選侍移宮群議鼎沸乃上仁義兼盡疏及楊漣去
國復抗疏保留一時歎其正直晉太僕卿璫禍起削奪
回籍

姚之騏號渥源桐城人萬曆丁未進士方正尚氣節力
學篤行仕湘潭令潔己愛民治績顯著以勞瘁卒於官
何早字白夫懷寧人萬曆癸丑進士巡視下江適璫李
明道督淮漕建議民運早力陳其不便疏爭之削籍去
懷宗初銓部交薦有鯁直端方之旨賜歸里

黃文星字辰北潛山人萬曆癸丑進士知同安縣甫一
月颶風發民居幾盡文星輟訟一載復其廬舍調清豐
治績益著擢駕部郎勤瘁卒於官櫬歸空橐而已

方大任字玉成桐城人萬曆丙辰進士由元城縣令擢
監察御史會魏忠賢墳塋越制特疏糾之削籍懷宗時
召還陞都御史

方孔炤字潛夫桐城人萬曆丙辰進士知嘉定州發奸
如神忤上官調福寧所至有聲入爲職方郎會魏忠賢
欲封其兄子良卿爲伯固執不覆遂削籍懷宗初起尙
寶卿巡撫湖廣時張獻忠寇掠總理熊文燦主撫議孔
炤上八策極言招撫之誤與賊遇凡九戰八捷後以香

油坪之敗爲楊嗣昌所陷天下冤之旋得白以河北屯田御史解職歸

姚孫渠桐城人天啓壬戌進士初令龍游請停商稅商民祠祀焉再補泉之晉江地瀕海爲鹹潦所淤飢民流離孫渠捐募糴穀以賑全活數萬擢西臺章奏悉中時弊

左光先桐城人光斗弟天啓甲子鄉薦知建寧縣以異績入西臺按部兩浙勤恤民隱周覈官方疏凡百餘上悉報可生平不避艱險偉烈直聲與兄齊名

汪游龍字六御懷寧人崇正辛未進士知廣東靈山縣接壤交趾蠻戶黎人時煽爲亂游龍至練兵設險民賴以寧調番禺值海寇劉香老入犯親決戰不避矢石香老卒成擒擢御史按閩時黃道周以劾楊嗣昌被謫力疏救之卒於官僚屬往殮惟敝衣數襲咸爲泣下

顏渾字伯通懷寧人崇正庚辰進士爲吏部主事憤要津持銓司短長乃倣范仲淹百官圖分註小冊遇有囑託者卽發冊示之見者慚沮予告歸囊橐蕭然

雷縝祚字介公太湖人崇正庚午鄉薦爲刑部主事每臨鞠悽慘形於色多所平反皖荒人相食疏請蠲恤里中賴以全活

王之慶字修祐望江人崇正時貢生除福建尤溪令政成卓異因親老致仕當流寇猖獗之慶糾集鄉人立社

保聚屢著戰功歿與左光斗雷縝祚並祀曰三賢祠
宋儒字文卿望江人初爲弟子員及長仕錦衣衛千戶
典告密錦衣在明爲近侍可立取富貴儒獨廉惠凡死
獄必求其生囚故無藉卧輒僵死儒奏以牧象草藉之
囚繫者缺食又奏以無主盜贓食之遂定爲例歲甲子
鄰弗戒於火焚燬畧盡儒樓獨存戊寅鄰又火亦如之
蓋隱德之報云

姚孫棐字戊生桐城人崇正庚辰進士令蘭溪民漕苦
南米一項孫棐力請兩臺具疏改本爲折勒石永利調
繁東陽臨城被圍馳走深山招集義勇乘懈擊敵東陽
得保尋解組歸

左國柱字碩人光斗長子光斗死璫禍國柱以藐孤重
繭數千里具血疏伏闕號冤得昭雪復官賜祭葬襲蔭
以副榜令浙之武康邑白糧久爲屯丁侵攬勒索無休
國柱力請官兌民困得蘇如出湯火惠政多端至今頌
之子正務雲鳳篤學力行名流引重孫廉文韓俱有文
名

國朝姚文然字弱侯桐城人明癸未進士授翰林順治初擢
禮科給事中康熙中掌印工戶二垣諸條奏皆關國計
民生而請寬大臣提解一疏尤爲得體累晉大司寇理
冤清滯校閱爰書常至夜午年衰成疾諸子諫之則曰
刃殺人於一時例殺人於萬世其可忽乎卒諡端恪

江南通志 卷一百一十一
張秉貞桐城人明辛未進士順治中歷官刑部尚書解
枉釋滯多所平反改兵部運籌軍國以勤勞卒於官諡
僖和

江臯字在湄桐城人順治辛丑進士由瑞昌令遷守鞏
昌大軍入蜀民困於兵臯與帥約軍卒無符信者不得
入境忽有數騎將入村漁奪詰問其照身不得悉囚送
軍門斬以徇由是肅然不犯改補柳州資遣被掠婦女
遷平慶道運給軍需歷隴塞賀蘭諸險作籌邊九策擢
大叅罷歸官轉七階家無半畝年八十一卒

盧璣字爾琛潛山人順治戊子恩薦授樂昌令均徭役
緩催科累遷永寧同知永寧故南詔地羗蠻雜處璣德
化漸摩俗爲一變署蒙化數月振興文學晉温州郡守
莅任三月興利除害以勤勞成疾卒於官

黃之麟字瑞白宿松人順治間由明經任江西興國令
興界楚閩百粵久爲賊窟之麟招降賊渠王大勇又滅
賊渠孫可貴勦梅窖峒賊曾拱宸等寇亂始平寬免賦
額墾田糧二千八百石有奇士民德之

金繼望字又呂望江人順治六年拔貢除河南宜陽縣
令兵燹之後招集勸墾民遂樂業擢兗州府黃河同知
到任卽周歷河干修築石香爐梁家樓新月諸堤水患
又捐俸賑饑修曹縣學終九江太守

高可極字爾建潛山人以歲薦知永豐縣下車卽詳食

江南通志 卷一百一
鹽免充廣餉捐買馬不起民夫以老病去任士民焚香泣送數十里

姚文熊字望侯桐城人康熙丁未進士令蕭山地值衝繁又閩亂未定芻糧取給於邑調度有方民得不困遷階州州與蕃地鄰亂後益凋敝到任悉除無名之征上官按舊例發吏督催文熊縛其驕橫者撻而遣之大計遂以不及例降調蕭人祀之

姚文焱字彥昭桐城人八歲能詩年十四補博士弟子員康熙己酉登賢書司鐸長洲教士有方陞峽江令革陋規輕徭役興學校戢奸宄峽人德之以母喪歸

張芑字武仕桐城人以明經通判武昌署府篆值標弁

夏逢龍叛被執不屈賊怒令褫衣冠縛至烈日中肌膚盡裂芑抗言益厲拘繫將戮之乘間夜逸錄狀報部請師勦平復原官遷嘉定州墾荒修學士民德之

孫元衡字湘南桐城人以明經知新城縣縣苦水患元衡濬孝婦小清兩河以殺其勢築堤十八里以捍其衝舉卓異擢蜀之漢州牧招集流亡給種教耕皆得安土爐蠻亂身歷行間設法轉運不匱又舉卓異遷東昌守張夔字次臯桐城人以明經歷知平山固安清苑皆畿輔近邑夔所至仁惠有聲有鄆氏疑獄久未決夔至立辨又章氏爲強暴所逼廉得其狀一時稱爲神明舉荒政建義學毀淫祠臺臣交章薦之擢大名廣平兩郡司

馬督理河務漳水決身親畚插捍禦堤防數月河患乃息被災之民捐俸賑給所活數千人

吳昉字五玉桐城人康熙乙卯副榜學古通經自守以正推產諸弟友愛篤摯善誘後學江南北薰其教能文者甚衆司鐸豐邑士習文風爲之丕變再攝縣篆豪民殺人輦金求釋卒抵之法年八十卒於官

王玘字其人桐城人由廩貢教習爲樂城令歲革羨餘千金浚井數百助民灌田樂人德之擢紹興別駕濬三江插及杭城內通商河俱百年堙廢之蹟以卓異累遷彰德太守

張廷瓚字卣臣相國英長子康熙己未進士蔣登宮尹趨承講幄屢膺纂修之任分校禮闈典試山左皆稱得人

聖祖北征沙漠三臨絕塞廷瓚以儒臣與扈從之列屢被

殊恩務益恪慎厥職尤熟於掌故翰苑著作多出其手生平孝

友任卹長子若霖字巖舉天性孝友好義樂施文行兼茂稱令子焉

夏瓚字景文桐城人博學工文以貢授雲南呈貢縣令振興文學革除陋規給牛種以勸墾歲饑賑救全活甚衆

張若需字雲舉桐城人廷瓚次子康熙戊子舉於鄉任嚴州同知攝義烏篆捐金造東門巨橋邑人名限公

永濟橋建祠橋側祀之遷梧州守輯盜寧民平糶給種多著善蹟擢蒼梧鹽驛副使病卒

特贈按察使銜雍正九年祀廣西名宦祠

江南通志卷一百四十六

江南通志卷一百四十七

人物志

宦績九 徽州一府

徽州府

唐胡學婺源人咸通進士仕撫州司戶上書忤田令孜竄福州尋授舒城令黃巢亂說李克用等協力勦之每臨陣為前鋒後加宣歙節度討擊使

南唐查文徽休寧人仕南唐累官樞密副使討建州王延政有功遷建州留後吳越兵據福州文徽攻克之入城撫其民陷伏中被執後遣還以工部尚書致仕弟文徽亦仕南唐

宋魏羽字垂天婺源人初仕江南爲判官歸宋擢太子中舍真宗時終禮部侍郎羽強力有吏幹好言事歷劇職十年始踰四十鬚鬢盡白

張諤字昌言歙人能文有吏材南唐秘書丞通判鄂州歸宋歷西川轉運使先是中土不習舟楫諤置威權軍分隸管勾始無覆溺之患子秉字孟節舉進士善詞翰歷官樞密直學士

謝泌字宗源歙人太平興國五年進士端拱初遷殿中丞直史館時王禹偁請羣官謁宰相須朝罷同時接見以防請託泌謂不可疑大臣以私輔臣非接見賓客何以究知外事上嘉納之嘗薦王旦數人皆至卿相官至

右諫議大夫判吏部銓年六十三端坐而逝

洪湛字惟清休寧人雍熙進士直史館咸平間使荆湖條奏利病甚衆時議城綏州使湛相視陳七利二害凡五使西北采訪邊事甚明悉與王欽若同知貢舉爲所誣累貶儋州

俞獻可字昌言歙人端拱初登第歷歸州軍事推官權領州事會李順反川陝官吏多棄城獻可料州兵屯沿江爲柵以遏之晉御史建言天下所上瑞物不在圖牒者毋得以聞提點廣西刑獄平定蠻寇爲立互市築塞以扼其險累官龍圖閣待制

查道字湛然休寧人文徽孫事母孝母病思鰕羹方冬

道泣禱于河得鱖以愈母端拱初舉進士歷官知果州西充賊爲患詔書招之不下道單騎趨賊所諭以詔意咸拜曰仁郡守也悉服會舉賢良方正拜左正言直史館天禧初求外任出知虢州時秋蝗災道不待報出官廩米賑之給民麥四千斛爲種全活甚衆道所至務寬恕嘗按部從者摘路旁棗以獻道挂錢於樹而去從兄陶字大鈞宮秘書少監判大理知審刑院賜金紫陶子拱之淳化進士歷官中書舍人有廉節

俞獻卿字諫臣獻可弟登咸平進士歷昭州軍事推官會陳進亂獻卿盡發州所積緡錢平糴得穀數萬大兵至賴以饋軍累遷三司鹽鐵判官上言天下穀帛浸耗

仁宗爲罷諸無名費以鉅萬計後知杭州江湖溢鑿西山作堤數十里民便之以刑部侍郎致仕

魏瓘字用之婺源人羽子爲開封府叅軍奏內侍以作燈山誅索擾民詔杖內侍歷提點廣西刑獄轉運使除雷化等州舟船計口之稅罷柳州無名之役尋知廣州倡築城及儂智高寇廣五旬不能下朝廷以爲功累遷吏部侍郎致仕

胡遇績溪人登慶曆進士儂智高陷邕州孫沔余靖以謀畧薦於朝除行營叅謀從狄青大敗智高擢湖南江西安撫使

王汝舟字公濟婺源人皇祐五年進士知南劍州捕盜

官邀賞增入盜賊擬死者十三人汝舟閱牘得其狀皆免死以治行第一聞哲宗時擢河北轉運判官諫罷市珠之令徙夔州提點刑獄告歸先守南劍時祖母沒上言諸父無在者乞以適孫解官終三年喪詔從之著爲令有雲溪文集

許元字子春祁門人以蔭陞泰州軍事推官戍兵千人自海上亡歸州守不知所爲元叱執倡首者三人餘悉勞遣遷知丹陽縣舊制盜決練湖水者罪死會大旱元請借湖水溉民田不待報決之守遣吏按問元曰便民罪令可也時京師粟少而江淮歲漕不給范仲淹薦爲發運判官轉輸不匱上嘉之拜侍御史

孫抗字叔和黟人登進士知潯州擢監察御史劾奏狄青不當沮敗永洛城事言日食陰盛當以後宮爲戒又諫止大獵遷都官員外郎提點江西刑獄有言歲凶當稍貴常平粟價以利糴本者抗言此非常平本意詔從之官至工部郎中

汪汲績溪人嘉祐進士授慈溪令濬河溉田數千頃民祀之擢太平推官解釋寃繫子奕襄皆登第有時名洪中孚字思誠休寧人湛孫元豐二年進士尉黃岡除鄰盜張韜主成都簿渡竿橋諭降雕門叛蠻崇寧初轉運熙河興鼓鑄權酤市易之利以給邊立墩堡給鎧仗興耕屯以防剽掠青塘內附中孚出不意夜半抵其地

撫慰之以察其情會皆畏服知太原府夏人提重兵來
議地界飭諸將掩擊遁去以龍圖閣待制致仕

王愈字原道婺源人紹聖登第知信州睦寇犯信擊敗
之爲王黼所嫉坐竄逐高宗時呂頤浩首薦愈起知無
爲州軍

程邁字進道婺源人元符三年進士由仁和尉遷知西安
縣部使者督諸郡水旱積欠邁曰衢州數年無水旱何
積欠也守不能屈由是他邑皆免高宗時歷知福州溫
州上稱其政光前絕後今之吏師又知平江鎮江時鄱
陽歲饑多盜以邁知饒州奏蠲舟車征算增米價以招
商賈不踰月米大至手條寬恤三十餘事民以寧息進

顯謨閣直學士

汪叔詹字致道歙人崇寧五年進士爲太學博士以直
言忤王黼斥歸久之權知蕪湖縣發運盧宗原議涸丹
陽湖爲田叔詹抗言爭之不得置印廳事走京師上書
言湖不可涸狀帝悟從之擢提舉潼川常平時東川鹽
井鹵竭民多虧課被囚奏蠲其逋且削煮鹽之籍南渡
後以司農少卿總領湖廣六路財賦凡八年無闕事
汪希旦字周佐歙人登大觀進士知泗州時劇賊宋江
橫行及濠濠泗密邇希旦嚴守備賊不敢犯開廩賑饑
蝗不入境麥生兩穗治最賜三品服歷知袁江舒三州
以朝請大夫致仕

胡舜陟字汝明績溪人大觀三年進士靖康中爲侍御
史奏誅趙良嗣力抗和議高宗立仍前職以彈宰相出
知廬州時淮西寇盜充斥舜陟修城治戰具招降劉文
舜擊走張遇孫琪戒諸郡無給叛將范瓊食而陰發兵
剪其後瓊遂絕江走時淮西八州惟廬安堵已而知靜
江府罷官復起經畧廣西連破周聰陳旺諸寇經畫買
馬諸政視常歲贏四倍運使呂源修怨讒於秦檜下獄
死後事白贈少師子仔知晉陵縣嘗寓苕溪著漁隱叢
話

黃葆光字元暉潯人賜進士出身授齊州司理參軍閱
獄囚一夕遣數百人通判以爲疑視牘無不當者擢監
察御史條奏三省樞密院吏猥多如奉入賞勞之類非
元豐舊制者革之歲省費數萬蔡京怒其異已徙符寶
郎復拜侍御史政和末歲旱葆光奏言蔡京僭擬跋扈
大臣皆依違畏避以致天變京中以他事謫降後起知
處州當方臘殘破之後盡心牧養卒州人祀之

金安節字彥亨休寧人宣和六年進士歷遷侍御史秦
檜兄梓知台州安節論其附梁師成罷之以是忤檜不
出者十八年檜死起官歷侍講給事中封駁論奏獨立
無黨張浚語人曰金給事真金石人也官至吏部尙書
請歸時以爲中興以來完名高節未見其比卒諡忠肅
汪若海字東叟歙人游太學以知兵召見請立康王爲

大元帥鎮撫河北高宗卽位遷江南經制使上言天下如常山蛇秦蜀爲首中原爲脊東南爲尾今以東南爲首安能起天下之脊哉欲圖恢復必在川陝遂以張浚宣撫川陝繼論軍食忤執政謫英州道出臨川時江夏軍馬李允文跋扈若海馳諭之允文感悟惟其下曹成不順若海以計得軍印遂奪其衆歸因獻平寇策朝廷悉用之湖湘遂安累遷直秘閣知江州時方經畧中原議起若海而若海已卒

汪勃字彥及黟人登紹興二年第調嚴州建德簿長於吏治不事鞭扑入臺爲諫議大夫遷御史中丞與秦檜不合求領外祠六年復起知湖州民鑄木曰賢哲太守

云

程叔達字元誠黟人登紹興十三年第教授湖州袖書見時宰論五事除監察御史賑兩浙饑以勞被獎遷右正言諫和糴四弊慶元中特除華文閣直學士卒謚莊節

朱安國字康侯休寧人紹興二十一年登第累擢御史嘗論釋六年未決之囚知廣州劇盜陳青寇海道安國授牙校李寶方畧縛青及其黨以歸威震一方進直徽猷閣安國喜談兵著陰符元機子拂宰姚江築捍海堤五千丈

李知己字智仲婺源人紹興進士判婺州軍士以給衣

絹輕持杖喧譁守稱疾知己呼其首勅以軍法仍計絹直給之衆乃帖服遷太宗正丞兼權都官郎

汪安行字伯壽績溪人學問精博登紹興進士知澧州時入奏請罷公使庫孝宗顧宰相王淮曰此朴直做家老子政事何如淮對曰舊攝澧州民思其德孝宗曰因民之思俾復守澧官至朝奉大夫

程大昌字泰之休寧人紹興進士主吳縣簿孝宗卽位遷著作佐郎時貴近或與密議大昌上言宜防石顯之奸帝以治道問大昌言當求賢納諫政事內修則大有爲之業在其中提刑浙東徙漕江西復清江縣舊堰以捍江護田陞秘書監歷官權吏部尙書出知泉州汀城

沈師作亂大昌趣統制裴師武不俟帥府符急進兵討之賊遂潰以龍圖閣學士致仕卒諡文簡大昌博學精思所著有禹貢圖論毛詩辨正演繁露考古編易原雍錄北邊備對尙書譜及文集

吳天驥字伯駿休寧人隆興進士調建昌司戶能折疑難獄知信州歲饑首修荒政發廩賑糶日至萬六千人終戶部員外郎

朱晞顏字子淵休寧人登隆慶進士知靖州奏言襄漢通吳蜀宜移武昌大軍戍襄陽留水軍以控鄂沔改知吉州上言西蜀備邊不在南而在北宜移成都制置司於興元與荆鄂相應擢廣西運判講究鹽筴革客鈔科

抑之患知臨安府仁和縣地多爲官舍軍營而稅額仍舊請以本府餘財代輸報可官終工部侍郎

汪泳字伯游休寧人乾道進士令蒲圻有聲累遷大理丞臨安有獄不決者卽繳送棘庭泳言於朝曰如此則天獄反爲京府一院乞下臨安自後無得繳送從之歷知太湖處三州轉中奉大夫致仕

程卓字從元休寧人淳熙十一年廷對首乙科嘉定中嘗使金察和議虛實歸奏敵人陵弱請固邦本修戎備以待復仇除軍器監請詔偏裨以上各條具方畧知泉州請減上供銀數又請勅廣南通行會子以流通境內楮幣除福州帥嚴察吏蠹稅清訟息遷同知樞密院事

一時政要多所規切卒諡正惠初休寧賦稅以卓請得蠲免鄉人祀之

黃何字景蕭休寧人知興國大冶縣有三山產鐵盜鑄者數千人尉不能緝密聞之朝調官軍且至何止軍境上單騎諭之皆感服遁散悉焚其具一境晏然歷知處州岳陽終朝議大夫

吳格字之平休寧人淳熙進士提舉浙西常平茶鹽歲旱蝗令民雜藝不種之田以自食官不收苗主不收租遷帥紹興請免定科浮財物力等錢官終起居舍人

朱權字聖與休寧人淳熙進士知惠州郡蝗權禱於神忽大雨水漲明日有鷹隼鳥雀驅蝗赴水死廣東有寇

權授將官方畧擒其魁

汪義和字謙之黟人淳熙進士知新建縣歲旱白帥府曰旱勢特甚已批放八分矣帥怒其專義和執愈堅帥從之守武岡崇學校增科舉以化溪洞武健之習官至侍御史兼侍講

江文振字子泉休寧人淳熙十一年進士歷司農少卿提點浙西刑獄時旱蝗民饑縣督逋監錮文振錄囚至華亭釋四百餘人令俟秋償檄他縣如之民賴以活

汪綱字仲舉黟人勃曾孫以任入官授桂陽軍平陽令平陽歲貢銀額萬餘兩綱以銀礦已竭力請蠲減會歲饑旁邑聚惡少入境爲患綱定之歷知弋陽蘭溪太平

諸縣俱有政績遷知高郵軍陳揚楚二州備邊屯守之要請修築興化海堰及石碓函管以疏運河水勢知紹興府濬蕭山古運河創牖甃涂以通舟車發巨室堽岸通湖水資灌溉儲緡錢三萬專備修築自是湖田始復理宗卽位召爲寶謨閣待制奏免越經總虛額錢九萬五千緡後權戶部侍郎致仕

趙善璚字德純歙人以宗室登嘉定元年進士又中明法科通判廣德軍歲饑借倉司米斛錢數千緡爲糴本平價濟民遷知江州亦如之上嘉其績召爲尙書郎歷中奉大夫

呂午字伯可歙人嘉定四年進士歷任蕪沿海制置司

時海寇未平午廉知調軍出海之弊議糧盡再給不許
擅還賊舟所有悉以給軍海氛遂靖上親擢監察御史
兼崇正殿說書與史嵩之忤力求去帝慰留乃復入臺
益敢言無所忌所著有竹坡類藁

吳發字伯韞歙人登第爲臨川法曹掾嘗慮囚慶元狴
犴充斥發或罪或釋應時決遣懽聲載道

吳輔字友仁休寧人嘉定進士主管兩浙運司幕職人
號爲霹靂手後除御史兼崇政殿說書首列四疏上輒
嘉納

汪勳字鼎叔黟人嘉定登第調淳安尉邑遭水患亟命
舟救溺賴全者無算授廣西檢法兼提幹北銀綱羨餘

悉歸公帑改辰溪時帥以辰溪遠雜諸獠欲移之勳謂
臣子之職不當趨易避難單車至邑諸獠帖服卒於官
程元鳳字申甫歙人紹定元年進士歷宗學博士輪對
稱旨理宗稱其有古遺直風除監察御史時臺官以論
列鄭清之被出元鳳疏斥清之罪遂召還臺官元鳳所
上章皆天下大計帝手書昭光清忠儒碩六大字賜之
遷侍御史奏薦有德望才學政績者二十餘人累遷叅
知政事拜右丞相未幾丁大全預政遂乞解機務度宗
卽位進少保致仕卒諡文清

方岳字巨山祁門人紹定甲科除淮東安撫司幹官高
郵軍閔岳以制命往戮首惡數人一城帖然制置使趙

蔡深倚之淳祐六年遷宗學博士時休寧程元鳳婺源
吳遇與岳皆受知范丞相鐘同遷博士有新安三博士
之稱差知南康軍以忤京湖闖賈似道調知邵武未莅
任峒寇作馳榜諭之寇知岳威名迎拜車下歷知饒袁
寧國諸州終朝散大夫岳自號秋崖有秋崖小槁及重
修南北史

王應元字尹卿歙人進士調潭州司戶叅軍奉檄道經
綏寧會猺峒嘯聚應元挺身召諭卒致降服知建平縣
有死囚獄具送郡道逸未幾自造庭下曰公明理盡情
寧歸死朝廷聞而異之累陞直秘閣

呂沆字叔朝午子端平間銓試第一知於潛逸囚聞沆
至自來歸罪判婺州賈似道議行公田又矯詔廢十七
界會子行關子沆皆力言非便賈怒調將作監簿三學
伏闕訟沆屈召赴行在不復出卒年八十一
胡崇字宗叟登淳佑第授句容簿制置使吳潛辟爲闈
幕委行經界法於溧陽不履畝而民皆依限自實歷官
太常寺丞上言公田之非忤時相出知台州台爲賈似
道鄉郡崇一切以公正行之

程元岳字遠甫歙人寶祐元年進士授武學博士率學
館同僚三叩閣言事遂出國門有旨慰留累遷工部侍
郎嘗彈擊奸相宦寺無所畏避封歙縣開國男

程鳴鳳字朝陽祁門人應武舉射策第一知德慶府將

之官適部內山猺猖獗或止其行鳳正色曰此正臣子奮志之日也至則條置事宜出奇掩擊賊黨悉平知南雄州進無逸說有讀史發微三十卷

許孔明字元熙祁門人入太學值理宗幸太乙宮伏闕上書諫游幸并言賢否混淆丞相丁大全變理失道上嘉納之寶祐四年登第仕終宣教郎

元洪椿字子壽歙人至元中爲仙居簿隣近賊竊發煽邑民李念二爲亂省遣萬戶提重兵至脅官吏手狀誣闔邑皆賊將屠之椿曰盜止一鄉餘民何罪以死爭得免積官至承務郎

明唐吉祥字彥貞歙人洪武庚辰進士令祁陽以一僕自隨及朝覲與僕策蹇出城弟自家來迎問之曰而兄行李止此矣歷葉南陽知縣皆有聲仕終工部主事

葉保翁字宗茂休寧人至正壬辰蕪黃盜起保翁與汪同起兵禦寇明鄧愈克徽州得保翁授婺州守修城積糧招撫流亡終饒州知府

程繩祖字叔武休寧人洪武中由御史左遷湖口令有惠政邑東黃麻潭田五百餘畝爲蛟所陷民虛輸稅繩祖禱城隍神白日雷擊蛟斃

胡永興字彥隆祁門人弱冠召入文淵閣纂修高廟實錄登永樂戊戌進士知三河縣奏減民賦仁宗時擢趙府左長史高煦謀不軌密使通趙永興泣諫王感悔及

高煦伏誅勸王獻護衛上表謝王從之言者乃息

王俊德字大本黟人登進士任御史巡按浙東有大豪訟搆無辜數十人廉得其由置豪於法遷河南副使叅理戎政陞廣東布政

王靜字永靜黟縣人由貢生授御史時值營造奉命巡工南北又往西域市馬陟雪山崑崙抵弱水遍歷七十二族陞漢陽府有盜十二人上司審允待決靜廉得無辜者論脫五人

吳寧字永清歙人宣德庚戌進士授兵部主事遷郎中爲尙書鄺埜所倚任埜從征土木留寧掌部事陞右侍郎佐于謙籌畫有功景泰初乞歸家居三十餘年卒

楊寧字彥謚歙人宣德五年進士授刑部主事隨征川賊約降主將欲許之寧曰兵未加而降詐也弗聽敗績諸將獲罪獨寧擢郎中復從王驥討之有功超遷右侍郎後叅贊雲南軍務練兵督耕邊夷大服閩廣盜起命寧撫江西據要設備盜至輒殲拜禮部尙書

汪敬字益謙婺源人宣德癸丑進士詔使湖廣纂修宣廟實錄事竣乞終母養起授戶部主事以廉能稱景泰間徽州知府以該徵稅糧本色繁重疏乞折納輕賚事下戶部敬力爲贊成一郡德之

程富字好禮歙人領鄉薦擢監察御史按江西歲荒妖賊煽亂富直擣其巢俘獲甚衆遷右僉都御史巡撫甘

肅麓川不靖總督雲南有功陞左副都御史

程信字彥實休寧人正統壬戌進士授吏科給事中景泰初以天變上中興固本十事首請隆孝友以答天心陞山東叅政天順初歷僉都御史巡撫遼東成化改元四川山都掌蠻作亂進兵部尙書督師討平之裂其地立長官司凱旋進爵卒諡襄毅

許士達字延佐歙人正統十年進士授御史景泰時數言事帝深納之巡按福建革除奸弊風裁凜然期滿當代耆老詣闕請留終貴州布政

汪回顯字汝光祁門人正統戊辰進士授戶部主事景泰初奉使見河南民饑奏發粟十餘萬石使蜀覈鹽井之久湮者減其額新開者增之又奏除冗課十餘萬歷知廣惠二府

莊歙字尙源歙人景泰辛未進士擢河南道御史考察賢否人服其明按浙江山東廣東福建奏免徵輸禁竊礦平賊寇止採珠按察雲南因其土俗以折獄訟政化大行終河南右布政

洪寬字有約歙人以鄉薦授桂陽州時洞獠剽掠寬遷州治於古府舊基民賴以寧改知鄭州值創藩封濬漕河立會府夫役浩繁寬極言州狹民貧得免夫役之半歲大稔奏免稅二分復請發陳麥官粟兼濟之

程泰字用元祁門人景泰甲戌進士授戶部主事犒師

陝西郤總帥餽進秩郎中用兵遼東遣泰治軍奉命視
山東災還陳四事多見舉行擢廣西叅政往定安南地
界終河南布政

康永韶字用和祁門人以舉人擢御史疏劾尙書馬昂
不法爭慈懿太后山陵事有直聲尋謫知福清縣以知
天文召還善筮法恐上溺術奏言臣但知易理耳仕至
禮部侍郎

汪貴字良貴歙人天順進士令嘉善覈田稅省小民賠
納之弊清介執法豪猾不利被誣去官民數千人攀號
請留其衣作留衣亭邑人周宙等上書訟寃詔復職

汪杲字廷輝休寧人天順進士授戶部主事董輸物料
於京師至江淮舟焚僚屬欲以私餘足其數杲以爲欺
罔弗許上章自劾遷曲靖軍民府守羅雄土官相讐殺
杲單騎馳諭卽解甲降

饒欽字克恭祁門人天順庚辰進士授戶部主事尋知
澂江府所屬土官無子欲以女襲職厚賂欽欽不受奏
以職官易之覲歸不仕有清名

謝潤字德潤祁門人天順進士授刑部主事陞浙江僉
事屢折疑獄不可干以私

汪奎字文燦婺源人成化丙戌進士除秀水知縣擢御
史應星變陳言出判夔州討平雲陽劇賊遷知成都府
歲饑多盜奎緩刑弛獄發廩賑之流移還集三遷布政

使進右副都御史巡撫貴州致仕

方思潤字廷膏歙人成化甲午鄉舉授桂陽知州振興學校調臨江通判盜不敢犯嘗奪宸濠湖田還諸民及歸宸濠使人伺舟次殺之由間道得免

洪遠字克毅歙人成化戊戌進士令三縣皆有聲爲御史敢言事遷浙江僉事歲大饑倣行富弼朱熹荒政民免流殍累官都御史巡撫雲南明著威信蠻爭降服晉工部尙書卒諡恭靖

葉鼎字致和祁門人以鄉薦知黃梅縣多惠政孀婦逋賦使傭織償所負有鬻牛輸稅者使立券以候秋成冤獄積年不決未旬日悉理出之憂歸民泣送越境而後

返

王珣字克溫祁門人成化戊戌進士選庶吉士改給事中嘗劾番僧論宮闈直聲甚著會試充校士官內閣私屬其甥珣遂稱疾不就查兩廣軍餉藩臬有不法者行賂求免珣卒劾之還朝疏時政六事尋爲廣西叅議

胡富字永年績溪人成化戊戌進士授大理寺評事遷福建僉事釋福寧疑獄二百餘人進廣東副使瀧水獠擾民富度獠所出沒處得荒田三千餘頃招獠人耕治獠畏獠遂不敢出黎人寇儋州率兵跨海討平之歷布政使進順天府尹逆瑾用事改大理卿豪奪民田賂瑾脅之富不從竟直之轉戶部侍郎進尙書致仕卒諡康

惠

汪舜民字從仁婺源人奎子成化戊戌進士為御史出按甘肅忤權貴謫官弘治初擢江西僉事決獄如流淮揚大饑奉命賑濟活饑民百二十萬人復業者八千餘戶歷官右副都御史舜民好學砥行持風節所著有靜軒行稿增校類編通鑑總目諸書

黃華字實夫歙人成化辛丑進士任金谿平江二縣知縣陞兵部主事奉勅大閱兩京山東浙江諸地得材官騎士數萬叅議福建討平汀賊逆瑾擅權遂解組歸

張敏字志學祁門人登成化辛丑進士知桐栢縣擢御史劾內宦怙寵肆橫巡江時按治京口渡夫中流橫索

渡錢推溺行李之惡仕終四川叅議

曹祥字應麟成化甲辰進士由戶曹出守寶慶興文教勸農業教民作水車以濟旱潦叅政四川巡撫貴州皆著有偉績

洪漢字朝宗歙人成化進士授行人累遷戶部郎督楚儲奏免逋課數萬陞雲南叅議提督銀場裁省中貴例供羨餘令礦官自赴司交課著為令

胡光字文光績溪人成化甲辰進士授廣州推官劾中貴出鎮不法事謫驛丞轉灌縣令築江都堰除虎患陞曲靖軍民府同知歸

程材字良用歙人弘治丙辰進士司理汀州入為御史

疏劾閹寺劉瑾馬永成谷大用等竊弄威柄瑾銜之撫其細故罰米輸塞上又徙其家屬於海南瑾誅得釋

張芝字廷毓歙人弘治丙辰進士授大理評事極言閹瑾竊權督學廣西會猺獞反監軍討之賊匿深穴中以計殲之擢荆南副使

吳遠字惟明歙人弘治丙辰進士爲莆田知縣歲祲多盜遠課農桑固封守賑乏困凡學宮橋梁郵舍皆治不費於民累遷黎平知府民雜猺獞喜弄兵遠教以禮讓彬彬向化

程瑄字德和歙人弘治丙辰進士除戶部主事擢發隱沒官緡四千權北新關稅清理屯田皆以廉稱遷泉州知府擢兩浙鹽運使

戴銑字寶之婺源人弘治丙辰進士選庶吉士授給事中詔求讜言銑條時事爲保治綱目上之正德初閹瑾用事銑上言宦官黨類宜加裁黜顧命大臣不宜聽引去逮杖除名世宗立贈光祿少卿

戴敏字遜之婺源人弘治丙辰進士知辰州府時算賊倡獮敏緋衣小隊馳賊營前驅呼曰太守來與汝語賊駭竄復呼曰太守來活汝非殺汝也賊稍稍出敏爲陳利害賊羅拜乞降尋擢貴州左叅政撫苗有功賜金幣吳漳字清甫歙人弘治己未進士令胙城擢御史以論逆瑾削籍瑾敗起官巡按北畿陞山東副使河決黃陵

岡漳殫力鳩工禱於神願以身塞河遂南徙復故道擢都御史

汪標字立之祁門人弘治己未進士知武定州蠲市稅民大悅陞刑部郎中逆瑾用事幾不免出知鶴慶府未期年政通民和調大理瀕行民遮擁不得前尋陞金齒兵備致仕

章瑞字廷召績溪人弘治己未進士授行人擢御史武宗初逆瑾竊柄瑞上言五事謫江西都事起知思南府時守備甘霖軍政久弛入寨賊時出剽掠霖欲屠十三村以冒陞賞瑞切責將劾之懼而止

唐澤字需之歙人弘治己未進士知平鄉縣平鄉多水

患澤興築堤防一百八十里遷刑部主事劉瑾擅權治獄者率阿旨殺人澤持法獨平累陞都御史巡撫甘肅自土魯番據哈密城疆場日多事久之寇數千穿塞盜邊病泄多死狼狽欲潰澤計羸寇殲之不足創艾令服使醫爲診治有間遣譯命之曰若病今起矣詰朝以戎服相見寇頓顙泣謝歸上表誓終身不復反已而悉還所侵地陞戶部右侍郎卒於涼州謚襄敏

鄭晃字晦之祁門人領鄉舉任曹州學正流賊入境率諸生守禦城得全陞長沙府判益勵清節逋賦者爭先輸納轉馬湖同知討平芒部叛蠻

潘珍字玉卿婺源人弘治壬戌進士起諸暨令歷陞山

東僉事流寇攻兗東掠曲阜廼奏移縣並闕里城之備
兵福建捕斬海南劇盜括刷海船之爲奸利者歷陞兵
部侍郎安南請討莫登庸廷議遣將問罪珍抗疏言安
南遠裔祇須遣使諭以禍福何必勞師遂以沮撓成命
落職珍廉直有行誼大臣交章薦不果用

程文字煥章婺源人登弘治乙丑進士歷大理寺正獄
無寃滯擢按察僉事備兵廣南猺獞不敢內犯以與當
道籌議邊事不合罷歸

潘旦字希周珍族子弘治乙丑進士授戶部主事典漕
真州遷邵武知府裁抑巨璫假上供擾民累陞至兵部
侍郎提督兩廣會征安南安南遣使求貢旦上疏宜從

所請以綏遠人不必窮兵萬里適珍以言得罪嚴嵩遂
絀且議不用引疾去卒贈工部尙書

李汎字彥夫祁門人弘治乙丑進士授工部主事歷正
郎出知思恩府猺獞變作單騎宣諭就撫者三萬餘人
邊境悉寧

金約字用博休寧人正德丁卯鄉薦署唐縣教諭會流
賊至身自乘城守禦賊矢中項拔其鏃益奮激固守賊
知有備夜遁晉國子助教

潘鑑字希古婺源人正德戊辰進士歷陞福建僉事討
蘇秉剪安南盜俱有功累陞右副都御史巡撫四川討
平西蕃深溝諸蠻擢工部侍郎總督川貴湖廣諸省採

木進兵部尚書提督兩廣軍務卒諡襄毅

曹深字文淵歙人正德戊辰進士率同榜百餘人撫劉瑾逆跡疏於朝罰跪午門五日終兵部主事

江一桂字伯馨婺源人正德庚午鄉薦知建寧縣擢南京部曹出守太平郡接壤交趾時莫登庸僭逆上命毛伯溫征之伯溫計先遣使臣往諭一桂請往登庸遂稱臣上偉其績賜賚特厚陞副使卒

汪元錫字天啓婺源人正德辛未進士選給事中兵部論偏頭關功敘錄太濫元錫疏斥本兵王瓊以下有罪無功不宜冒賞帝北幸昌平宣大南征宸濠元錫皆上疏力爭及世宗卽位首陳先朝羣奸蠱惑基禍宜付法

司定罪從之陞太僕寺卿李福達之獄以直言被杖罷歸再召官至戶部侍郎卒贈尚書

黃文光字應奎休寧人正德癸酉鄉薦知冠縣清儉愛民部使者持倉庫吏責私簿典庫曰令尹無一錢私出入簿安得來使大驚異

趙時勉字誠之歙人正德癸酉鄉薦謁選上時務二十事知武城縣歲饑民流請監司入疏蠲民租之半每歲省廚傳之費不下數千緡

胡松字茂卿績溪人居家以孝友稱由正德甲戌進士爲嘉興推官晉御史請究宸濠奸黨罷內官店裁東廠衙門薦謝遷韓文彭澤林俊羅玘諸人世宗朝論桂萼

起用王瓊事出知廉州歷陞右副都御史上治河便漕
疏尋晉工部尚書時伊庶人賄嚴嵩請拓府第大將軍
仇鸞陰蓄異志請屯親兵輦轂下便宜給武庫軍仗松
皆力陳不可及伊庶人仇鸞敗果如松言卒論祭葬
鄭佐字時夫歙人正德甲戌進士授南刑部主事改祠
部疏議大禮極陳後殿災變之由遷福建僉事尋備兵
饒州勦誅閩饒宿寇

方紀達字行可歙人正德丁丑進士令南豐擢給諫時
張璁桂萼驟用事達抗章論列調廣西僉事卒僚屬合
贈而後能殮

汪思字德之婺源人正德丁丑進士選庶吉士授給事

中嘉靖初首薦耆舊大臣石瑤韓文彭澤等以輔新政
極論太監崔文鮑忠芮賢之罪薦尚書林俊之忠力救
諫臣劉最謹論重一時未幾元宰論翊戴功爲外戚議
封思奏寢之外補廣東僉事終雲南副使

胡宗明字汝誠績溪人正德丁丑進士授戶部主事進
廣東叅議設奇俘馘劇盜叅政廣西平黎有功累陞副
都御史巡撫遼東增築屯堡多做古法

潘潢字薦叔婺源人鄉薦第一正德辛巳進士知樂清
縣入爲禮部郎進大學衍義勸御經筵改吏部署選事
冢宰欲私二人潢不從督學閩中立輔仁紀業二冊講
明正學歷遷至戶部尚書與嚴嵩忤以議論條例不合

上疏自劾徒有用一緩二之心罔知隨時通變之術徒南工吏兵三部尙書卒諡簡肅

程輅字邦載績溪人正德辛巳進士授行人陞兵科給事兼侍經筵上時務六事奏革詭冒武官二千七百餘員因劾武定侯郭勛忤旨削籍後復官

陳有容字仁甫休寧人嘉靖壬午舉人授歸德知州舊有額外金二千白上臺歸之公擒鄆賊高寵餘黨後知歸州有減抽分諸善政晉瑞州府同知

汪仲成字汝玉績溪人嘉靖丙戌進士授大理評事有巨閹從子殺人賂諸問官求脫仲成力爭不署名竟抵法遷思恩知府時土官岑濬以叛誅其子岑金率黨攻

城成計縛之調柳州歲有船稅千餘金成委備軍餉一無私焉

鮑象賢字復之歙人嘉靖己丑進士授御史歷雲南副使累遷陝西巡撫移雲南集兵討流江賊那鑑平之總督兩廣連建靖寇功官終兵部左侍郎

舒遷字于喬黟人嘉靖乙未進士授行人時都御史歐陽鐸議增山稅遷力止之考選御史著居官慎已二銘議大禮多所建白按山西清理鹽課羨餘悉奏賑邊按廣東剪豪暴黜貪污復厓山之祀所至有聲

胡宗憲字汝貞績溪人嘉靖戊戌進士授益都令擢御史出按宣大定邊亂復按浙時東南苦倭寇華人汪直

徐海等爲之主督撫以宗憲善用兵請當一面遂破倭於王江涇遷巡撫晉總督節制七省軍事專任治倭設奇計攜其黨與賊首以次就擒東南寧息進大司馬加少保後以人言逮至京上曰加宗憲罪後來誰肯任事乃得釋繼又被劾下獄瘐死萬曆初追諡襄懋

汪文式字時憑婺源人嘉靖癸卯鄉薦知華縣賊帥尙詔攻掠城邑一日假校尉帶數十騎過華文式偵知爲賊擒斬之事聞詔建偉績坊

汪垵字仲成休寧人嘉靖甲辰進士授戶部主事轉員外郎屬修會典十三司皆垵總裁陞福建僉事出死囚以禦倭捷聞賜金綺擢叅議

殷正茂字養實歙人嘉靖丁未進士爲兵科給事帝勤齋醮正茂與同官言黷祭非禮不肯進香予杖尋陞江西按察使廣東猺獞自弘治中作亂數征不克至是擢正茂右僉都御史爲巡撫往討平之陞兩廣總督時倭寇縱橫正茂徙邊海謫戍之民於他處絕倭嚮導請寬減採珠銅蠟貢物以甦民困然後分布攻守盜以次盡平以功加兵部尙書晉戶部致仕

汪道昆字伯玉歙人嘉靖丁未進士知義烏縣歷福建兵備副使有悍卒擁脇巡撫莫能支道昆遽馳入軍門戮首事以徇一軍寂然倭陷興化全閩大震道昆走浙請督撫胡宗憲檄戚繼光將兵往道昆主畫策繼

光主轉戰賊次第削平累陞都御史歷撫福建鄖陽湖廣神宗立召爲兵部侍郎出閱薊遼邊備乞終養歸詩文與李攀龍王世貞狎主齊盟所著有太函集

方弘靜字定之歙人嘉靖庚戌進士任東平州視學粵西尋轉江藩使者治嚴嵩父子獄有所波連弘靜訟言白之旣持節入浙時方苛剔濫費弘靜疏言去冗不如增備增備不能惜費因大修艤艦會諸將急擊寇覆其水寨論功當超敘中蜚語歸卒贈工部尙書

程金字德良歙人嘉靖癸丑進士授南工部主事秋毫不染分司龍江關要人援權相勢撓關法金篋其船工徇於市遷部郎出守漢陽發楚藩外屬奸贓張居止治

第托漢陽守市木金雅不直居正居正奪情遂投劾歸方良曙字子賓歙人嘉靖癸丑進士授工部主事權木荆州關吏請兼算舟充額曙不許額旣足乃罷兩月告緡恤刑畿輔釋三寃獄嘗倣長垣故事治河河不爲災後轄雲南濬昆明池溉田又築晉寧州城終應天府尹江一麟字仲文婺源人嘉靖癸丑進士知吉安州擢工部郎時言官吳時來等劾嚴嵩下獄一麟力救得免轉廣平知府歲旱步禱三日雨集蝗死廣寇蜂起擢監軍副使督軍力戰馘其渠時倭寇海豐島賊陷甯白皆次第削平擢撫貴州有苗酋葉楷累世負固麟設奇用間搗其巢建縣治之晉都御史兼戶部侍郎總督漕務病

卒諭葬祭

程道東字震伯歙人嘉靖己未進士授工部主事奉詔營景藩宮室還治河有績通判青州遷知深州復以治海擢戶部郎中出爲雲南知府告歸

凌琯字惟和歙人嘉靖壬戌進士司理南安追殺巢賊擒其渠魁擢御史政府欲釋都御史路楷琯以其黨奸殺沈鍊力持不可著直聲終陝西按察使

許國字維貞歙人嘉靖乙丑進士選庶吉士授檢討奉使朝鮮饋遺一無所受萬曆改元陞右贊善充日講官每進講託事獻規帝悚意聽之累官至文淵閣大學士卒諡文穆國爲人木強遇事輒發數與言者爲難然廉

慎自守人故不能汙初在館局爲張居正所器居正父病朝士醜禱國獨不往尋以奪情留任國詣其第密勸行服其在樞輔值帝倦勤累疏請建儲帝不悅遂五疏乞休

游應乾字順之婺源人嘉靖乙丑進士歷部郎出守寧波濬陂塘通水利時郡邑承張居正指毀書院惟寧波獨存累陞雲南按察使平巨寇丁改轉廣東右布政島寇大至率勵吏士乘城拒守擢大理丞昭雪冤滯謂其屬曰廷平所以平天下之不平也如止押司寇紙尾焉用平爲累遷總督倉場先後條上四十餘事皆著爲令許天贈字德夫黟人嘉靖乙丑進士知海寧躬親履畝

丈田清稅擢戶部主事權北關以廉惠稱守建寧疏古渠創建寧二衛遷兩浙長蘆使轉山東叅政著有北關考兩浙長蘆事宜

余一龍字汝化婺源人嘉靖乙丑進士知江山縣擢御史疏請東宮出學乞宥諫臣鄭履淳嚴絕餽遺或餉以酒碎其甕有擊甕侍御之號補湖廣僉事治兵沔陽平桐栢湖寇擢貴州副使撫叛苗四十四寨籍爲編戶繼而苗安爲寇一龍念其狃於招撫出不意除夕往殲之特賜獎勞後以南太僕卿謝病歸

汪文輝字德充婺源人嘉靖乙丑進士官御史會首相高拱以內閣掌吏部其門生輩居言路專務搏擊文輝亦拱門生心獨非之疏陳四事忤拱出爲寧夏僉事監互市單騎諭敵咸感服無所擾進尙寶司卿張居正用事移疾歸

楊旦字明甫休寧人嘉靖舉人知奉化縣築天寧長沙二堤民利之通判杭州革織例金三千緡轉青州疏河運三月成功致仕歸

余懋學字行之婺源人隆慶戊辰進士爲司理剖決若神擢南給事中論劾張居正又陳五事居正疑有所指矯旨削籍居正死召還歷官戶部侍郎歸杜門著書嘗曰學患不真與其爲僞中行不若爲真狂狷卒諡恭穆羅應鶴字德鳴歙人隆慶辛未進士知景陵黃岡二縣

召爲御史按東粵適有蠶戶之役應鶴說督撫曰耦而俱者蠶與民也願生俘之母馘督撫納其言先後釋纍俘數千人督學三輔累遷太僕卿陞保定巡撫

方揚字思善歙人隆慶辛未進士歷遷南戶部郎有怙權相勢者私據公田託言爲社田以給貧乏乞揚作記不應遂以事誣之謫秀州遷守杭州乞歸

胡宥字子仁休寧人隆慶辛未進士令長垣平獄訟省租庸繕城修學政聲籍甚擢南御史江陵柄國御史傅貞言事編戍特疏請釋之巡按廣西攝廣東鹽法佐軍興用兵入寨紀功賜金幣御宴七次蓋異數云

江東之字長信歙人萬曆甲戌進士由行人擢御史首發馮保徐爵奸劾僉都御史王宗載與于應昌共陷御史劉臺以媚張居正乞從先朝楊路等謀殺沈鍊例抵罪命勘邊臣周詠等掩敗爲功狀得實直聲大震遷太僕卿時張馮黨復構陷張岳沈思孝吳中行趙用賢鄒元標諸臣東之發憤上疏請先自罷復以山陵事與執政忤貶知霍州累遷大理少卿尋以右僉都御史撫貴州被劾免官

余啓元字伯貞婺源人萬曆甲戌進士知臨城縣會有履畝丈量之令啓元以無故擾民置不報忤江陵相意改霸州學正歷陞部郎監豫章漕兌罷虛耗四十萬石尋督易州糧儲累陞大理寺卿致仕

汪應蛟字潛夫婺源人究心性命深入閩奧萬曆甲戌進士除南兵部主事督學四川備兵易州劾礦使貪恣不報移治天津陞巡撫又移保定在天津時開葛沽白塘棄地爲水田歲得穀以充餉及至保定上疏請廣興水利可得田數萬頃帝許而不能行晉工部侍郎光宗立改大司農疏愛民十八條阿保客氏求墓地踰制應蛟執不與尋告歸時毀書院禁講學乃作默識解示門人所著有理學經濟二編

程子鰲字坤輿歙人萬曆丁丑進士令蘭溪吏以解羨上子鰲斥之不畏強禦雅意作人叅藩廣西地多猺獞鰲一意拊循無梗化者終江西按察使

張應揚字以言休寧人萬曆癸未進士知蘭溪縣禁溺女置社倉擢御史出按雲南順寧代候二寇搆兵應揚籌畫救寧之復按福建出冤繫者甚衆

程朝京字元直休寧人萬曆癸未進士令鄱陽邑多積逋朝京立週知實徵二冊課遂如額陶丁藍芳威爲亂討平之又力言芳威於上官貸死戍邊卒爲名將累陞永平知府因灣水運天津糧至闕家口省輓輸數倍晉福建副使

潘士藻字去華婺源人萬曆癸未進士授溫州推官擢御史忤東廠張鯨會火災疏請修身親賢語甚切摯鯨乃激上怒謫廣東布政司照磨謝表曰積忱未至自反

殊慙東西南北莫逃天覆地載之間進退行藏皆爲進德修業之地後量移南吏部主事陞尚寶少卿

邵庶字明仲休寧人萬曆癸未進士選庶吉士改兵科給事中疏請清驛遞汰運總冗員革錦衣冒濫裁戚畹越請陞工科都給事再補禮科請臨御躬祀及行召對開儲講陞太常少卿

方元彥字士美歙人萬曆丙戌進士知金華縣擢御史按甘肅嘗陳備邊五議按閩釋寃發奸卻紅毛番市鎮安海堡城又建言星變地震宜撤瑞使以答天譴卒於官

吳中明字知常歙人萬曆丙戌進士任瑞汀兩府推官

陞主事歷吏部郎中疏列礦奄陳奉梟橫狀提學河南分守汝寧汝寧王縱僕殺人中明以僕抵法備兵薊門葺邊墻開耕屯治績尤著陞陝西布政廣西巡撫南戶部侍郎卒

金繼震字長卿休寧人萬曆丙戌進士知義烏縣公署火恐獄囚盡斃縱之歸約令自來無後者累陞刑部郎中恤刑山東遼東釋寃繫四百餘人報命課第一

洪文衡字平仲歙人萬曆己丑進士歷任南北部曹疏請建儲居工部力杜中貴橫索節冗費甚多晉光祿少卿上八事上爲寢景醮之命陞太常卿議請祧睿宗時以爲當卒贈侍郎文衡性孝居喪斷酒肉不處內三年

黃全初字性甫歙人萬曆己丑進士知崇德縣歲荒請蠲逋賦當事不可遂引疾歸起南國子博士遷南戶部主事軍餼多冒支悉釐其弊歲省萬四千緡晉郎中汪先岸字登于休寧人萬曆己丑進士知光山縣擢御史上疏請正國本首輔依違其議遂疏劾之巡視漕河建開泇河議河成歲省金錢無算仕至太僕卿魏闈用事削籍家居勅立還古書院

汪以時字太易婺源人萬曆己丑進士爲縣治最授御史督理河東礦使張忠奏開採南池徵收鹽課以時抗阻之爲所誣奏幾不免轉按山西廉治稅棍出冤獄八百餘人建城堡於青龍驛轉南太僕卿

葉伯鳴字雲羽休寧人任沂州同知潔己恤民塞礦穴疏鹽禁署單父平馬政出大辟三人邑以白蓮教被累者盡釋之改涿州涿地衝民疲伯鳴以休息爲理擢藩司理問

金忠士字元卿休寧人萬曆壬辰進士令樂平以卓異考選御史按貴州勘定水西討平洛苗按浙江賑澇饑戢兵伍按河南勦巨寇歷遷至僉都御史巡撫延綏晉少司馬

方時化字伯雨歙人萬曆甲午鄉薦知朝城縣時白蓮賊逼擾時化偵知邑中巨猾王甲周乙召爲約正捐其宿負以甘言撫之二人願盡力遂以計縛賊主閻氏等

斬之終敘州府同知

鮑應鰲字山甫歙人萬曆乙未進士授戶部主政權崇文稅管太倉庫秋毫無染補祠祭司郎中孝靖皇太后薨詔依世宗沈貴妃例鰲以沈貴妃例簡畧乃考穆宗母孝恪皇太后時爲康妃薨儀注增十三條疏上卽允行之鰲在儀司凡議諡卹守正不阿尋陞尙寶卿晉太僕卒

畢懋良字師臯歙人萬曆乙未進士除萬載令陞禮部郎督學浙江轉福建督糧道括諸項羨銀及贖緩積穀數萬石後紅夷寇海上糧艘不通發所貯穀民藉全活尋晉方伯減加派撫降海寇累陞戶部侍郎總督倉場

議以本色折色相間給發每年可積米八千餘石會以不附魏璫斥罷時與族弟懋康並有清譽稱二畢懋康亦爲璫削籍相繼去士論以爲榮崇正初起工部侍郎洪世俊字用章歙人萬曆乙未進士除禮部主事時諸王婚期踰制講學禮廢福藩久不之國力爭十餘疏出叅漳南會紅夷入寇預堡圭嶼儲火藥禦之寇不爲害轉山東左布政平白蓮賊陞太常寺卿

汪元功字元倩歙人萬曆乙未進士除光化知縣遷吉安府補順德備兵雲中力行節省以完兩年貢市額素囊部落不靖元功單車馳諭官至湖西觀察

吳宗堯字仁叔歙人萬曆乙未進士知益都縣性强項

中官陳增以開礦肆虐宗堯盡發其不法事列狀上聞請以一身易萬民命帝心動令增約束其下增劾宗堯阻撓礦務遂被逮民數萬遮道衛送哭聲震地下獄經年釋爲民

謝存仁字生甫祁門人萬曆乙未進士授戶部主事權關監兌有清望督儲遼陽陞叅政歷雲南布政陞巡撫簡兵核餉請告歸

胡思仲績溪人萬曆乙未進士知上虞縣築夏蓋白馬上妃三湖灌田又築梁湖石牖民享其利進兵部郎陞副使備兵懷隆建城堡修邊垣開沃田節虛冒銀兩遷保定巡撫治績尤偉畿南賴之以安

畢懋康字孟侯歙人萬曆戊戌進士授中書選御史出巡長蘆盡釐鹺弊請修復河渠諸牖按陝西山東皆值飢歉講求賑法無出懋康右撫鄖陽以忤璫編名黨人尋起南通政仕至南戶部侍郎

吳國仕字秀升歙人萬曆甲辰進士授刑部主事守嘉興均調賦役定官解之法築海塘及漕堤建石梁於王江涇治行推第一備兵辰沅叅政川東擒奢酋將樊龍以復渝城繼搗藺賊破之數轉至福建左布政有平海寇功遷南太常卿晉戶部侍郎

汪有功字祖倩歙人萬曆甲辰進士知蒲圻縣擢南御史所上疏如勸青宮講學劾巨璫亂閩及藩臣不當

祭孝陵與張差肆逆當窮治其奸皆中時弊官至尙寶
丞

汪輝字柱河休寧人萬曆甲辰進士由庶吉士歷吏部
侍郎勁節不阿魏璫建祠欲屬輝記輝絕不與通璫銜
之矯旨削籍崇正初復職

余懋孳字舜仲婺源人萬曆甲辰進士知山陰縣擢給
事中歷疏請發留中章奏舉枚卜釋繫囚停稅使賑東
方饑民黜西洋天主教又言帝久不御朝中外扞格堂
陛闊絕前後章數十上俱切中時弊

倪思輝字實符祁門人萬曆丁未進士天啓間官給事
中劾保姆客氏謫閩幕後起兵科給事歷通政使忤魏

璫削籍崇正初起刑部左侍郎南戶部尙書逾年告歸

舒榮都字曰俞黥人萬曆丁未進士授中書任御史上
三字疏曰虛公嚴其餘言邊務則劾督撫周永春等言
門戶則劾通政賈繼春等皆甚剴切巡按湖廣時貴竹
土司叛榮都代爲畫策勦平之天啓間欲與楊左連名
劾魏闖會外艱不果後憂憤卒追贈太常卿

江秉謙字兆豫歙人萬曆庚戌進士知鄞縣擢御史抗
疏言封疆事請置本兵張鶴鳴於法訟經畧熊廷弼功
內操事與秉謙連疏糾之諸奸切齒遂削籍

程策字獻可休寧人萬曆庚戌進士授西安推官清介
自勵轉南禮部主事時拜魏璫祠者如鶩策獨不往守

德安有七府奸民同日謀不軌策密緝捕渠魁餘不問
反側以安晉鄖襄叅政流寇深入設伏大敗之

汪泗論字自魯休寧人萬曆庚戌進士授漳浦知縣擢
御史疏杜內批以防微漸出按江西力持大體晉太僕
卿

趙時用字德友休寧人萬曆癸丑進士知南安調閩縣
擢給事中抗言恩蔭不宜濫敘閣臣票擬讓權中官事
多內批徑出宜防其漸忤崔魏矯旨削奪後起南鴻臚
卿

汪康謠字衢父休寧人萬曆癸丑進士知諸暨縣陞戶
部主事出守漳州有販海遭颶風者七十四人前吏誣

爲海寇康謠廉實釋之蘇撫周起元以忤璫坐贓數萬
下漳州籍之康謠閣不行遂削奪後復官擢福寧兵備
道

汪應元字長孺歙人萬曆丙辰進士授太常博士魏璫
用事以奉差歸崇正初召爲御史出按廣西歲大旱甘
澍隨車罷牛稅罷榷木多所釐革

汪元標字承景歙人萬曆丙辰進士由潭陽知縣晉吏
部主事歷掌四司值權璫用事罷官歸旋起備兵海上
擒大盜蕭潮等千餘人聞以安堵晉福寧道

許啓敏字元建歙人萬曆戊午舉人任登州府推官有
負官物抵法繫獄至數百人啓敏至多所平反白院道

出之其不可宥者令煎鹽貸死晉兵部主事

黃願素字若鏡歙人萬曆己未進士爲撫州推官擢吏部主事疏汰假官百八十員鉞銓曹事宜存之部中他如禁飛布山燒鑿以護地脉設界嶺防守以清盜寇鄉人賴之

黃正賓歙人由貲入官爲舍人思樹奇節萬曆中以緩冊東宮抗疏劾首輔申時行下獄斥爲民遂有聲士大夫間熹宗立起故官再遷尙寶少卿致仕崇正初闖黨徐大化楊維垣已罷官猶潛居輦下正賓疏發其奸都人快之

吳彥芳字延祖歙人天啓乙丑進士知莆田擢御史甫九月疏十一上登州用兵請撤監視諸中官最後以排擊邪媚撓上怒下獄尋釋歸

方士亮歙人崇正辛未進士歷嘉興福州推官擢兵科給事中疏陳時弊論劾謝陞徐世蔭馬爌等薦方岳貢陳洪謐等陳新甲主欵議士亮首發其罪復論中官出鎮之弊乞撤回語極明切周延儒出督師無功獲譴以士亮贊畫軍務削籍歸

國朝張光祚字雲仲歙人舉順治丁亥進士知鄧州督戰艦征湖南區畫有方盜壘於下庄祚單車諭之皆就撫陞禮部員外郎會河決不忍去治之巡督七晝夜不入署以勞瘁卒

吳正治字當世休寧人漢陽籍順治己丑進士選庶吉士授編修以侍講出補江西叅政轉陝西按察使所至以清廉執法著內擢工部右侍郎轉刑部諸所條議如赦令宜急行文量宜停止禁狀外指扳嚴婦女私嫁免逃人十家連坐及收旗丁月錢皆著爲令晉禮部尙書拜武英殿大學士守成法持大體以病致仕

趙吉士字天羽休寧人順治辛卯舉人知交城縣交城北阻深山自明季爲盜窟吏不敢詰值山中饑吉士以勸農闢荒爲名率數騎入山中留宿土窰左右皆懼吉士意氣自如旣熟知其山川險易居民順逆一日與同官飲却月湖笙歌迭奏賊聞之不爲備忽夜半歛兵疾

行由間道搗賊巢擒一百一人撫定山民一千四百餘戶其不從賊者給羊酒旌之敘功陞戶部主事權楊州關擢戶科給事所著有續表忠記徽州府志萬青閣集洪琮字瑞玉歙人順治壬辰進士除韶州推官時東粵新附郡縣供辦軍需琮條上幫貼夫船議吏民得蘇息縛妖民郭天鵬擒虔賊王秀皆不煩兵歷員外郎中督學陝西子景行平陽知縣清漏租除規費禁絕賃妻火葬諸惡習

汪宗洙字魯源婺源人以歲貢仕內邱知縣於時西山劇盜嘯聚民多流亡宗洙招徠懷集案牘不煩郡司理臨邑閱獄囚繫止有上臺委決者二人

余維樞字中台婺源人以鄉副榜知永年縣葺學宮立義塾築河堤造布衣張蓋廬訪以政事補臨縣政聲益著陞督捕主事卒維樞學有原本著從祀諸儒繫議泮宮禮樂合集令洛錄及文集

吳聖楫字右舟歙人順治甲午選貢知文縣壤接西域番民雜處楫控御有方力懲奸民冒充旗丁蜀軍竊販馬匹之弊

許書字元文歙人順治乙未進士知涑水縣旗民畏愛內擢之日挽留者遮道後由禮部郎出知南康卓有政績

洪明鍾字萬貞歙人順治十五年以舉人知海澄縣時澄帥縱士卒索餉而譁明鍾曰餉非緩也吾將按籍而給如虛卒倒馬則奈何帥爲稍戢以軍興積勞卒邑人懷之

程文彝字銘仲休寧人康熙甲辰進士由翰林改刑部主事舊例民娶旗女當離異文彝議償身價著爲令擢監察御史多所建白如升遵化縣陵邑爲州定地壇配位尙右清驛馬貽累廣旌節孝革除里役禁軍需私派及佐貳武弁用嚴刑皆見施行累遷大理少卿仕終工部右侍郎

汪錚字鐘如休寧人以江夏籍中康熙庚戌進士累官驗封司郎中每大廷集議敘資紛紜錚口授指揮羣吏

成服冢宰特薦掌選丁憂服闋借補稽勲以病歸子澂汪晉徵字符尹休寧人康熙己未進士由翰林改給事中中有修先賢書院增張載世襲停藩臬卓異寬兩廣限憑諸疏丁卯主試湖廣遷順天府丞累官戶部侍郎居官持重精敏居鄉講學紫陽還古書院所著有宋元明正學錄雙溪草堂集

吳苑字楞香歙人康熙壬戌進士選庶吉士授檢討歷中允侍講遷祭酒奏請諸教習官學者歲滿補縣令勿補州倅以通沉滯塞倖門又嚴試補教習之法又令八旗子弟在官學者一體考校鄉會試量增其額以示鼓勵省親告歸所著有北照集

張瑗字松巖祁門人康熙辛未會試第一授翰林編修主試四川改御史明闖魏忠賢墓在西山侈甚上疏請毀之報可朝野以爲快提督河南學政瑗賦性淡泊素履端詳居官以廉謹稱



